

集古官印考證

集古官印攷卷十

嘉定瞿中溶編輯

男樹鎬校刊

關外侯印

龜鈕

右關外侯印集古印譜曰黃初定制關外侯爵十六級銅印
龜鈕墨綬又宋馬永卿嬾真子云僕仕於關中嘗見一方寸
古印文云關外侯印其字作古隸氣象頗類受禪碑僕意必
漢末時物也然疑只聞有關內侯不聞有關外侯後於魏志
見之建安二十三年始置名位侯十二級以賞軍功關外侯
乃其一也注云今人虛封蓋始於此則此印亦可當屬之漢
矣

菑川侯印

吳氏

右菑川侯印案漢書地理志菑川國故齊文帝十八年別爲

國後并北海攷王子侯表文景時齊悼惠王子懿王志及武
城侯賢皆徙封菑川王菑菑古通印文上从卅而中變𠂔爲
一繆也漢以菑川郡封王子卽改稱國然係郡王而非郡侯
菑川旣以齊郡改封而又不設菑川縣則此非漢印可知漢
無公侯伯子男五等封爵王莽雖曾叛置而此印文非五字
與其制不合故定爲魏物攷晉書地理志魏文帝黃初三年
初制王之庶子爲鄉公嗣王之庶子爲侯公侯之庶子爲亭
伯劉備章武元年亦以郡國封建諸王或遙採嘉名不由檢
土地所出孫權赤烏五年亦取中州嘉號封建諸王晉文帝
爲晉王命裴秀等建立五等之制如魏武帝泰始元年封諸
王以郡爲國又職官志言咸甯三年衛將軍楊珧與中書監
荀勗以齊王攸有時望懼惠帝有後難因追故司空裴秀立

五等封建之旨從容共陳於是詔議其制奏從諸王公更制戶邑大國小國皆制所近縣益滿萬戶又爲郡公制度如小國王郡侯如不滿五千戶王于時惟增魯國公戶邑進封故司空博陵公王沈爲郡公鉅平侯羊祜爲南城郡侯又南宮王承隨王萬各於泰始中封爲縣王邑千戶至是改正縣王增邑爲三千戶制度如郡侯自此非皇子不得爲王而諸王之支庶皆皇家之近屬至親亦各以土推恩受封其大國次國始封王之支子爲公承封王之支子爲侯繼承封王之支子爲伯小國五千戶以上始封王之支子爲子不滿五千戶始封王之支子及始封公侯之支子皆爲男非此皆不得封其公之制度如五千戶國侯之制度如不滿五千戶國伯子男以下各有差唐六典注云後漢又有鄉亭侯之號魏氏五

等皆以鄉亭多假空名不食本邑及司馬宣王誅曹爽封舞陽侯至晉復五等之制宋齊之後或置或廢亦不常也此印見范氏印譜云鼻鈕文與此不異蓋先爲范氏所藏也

膠西侯印

桂氏

右膠西侯印案漢書地理志高密國故齊文帝十六年別爲膠西國又王子侯表齊悼惠王子平昌侯印後封膠西王則膠西亦漢王國而此云侯與前菑川同

大年案繆篆分韻西下注膠西侯印今審印文實侯非侯西下注誤也郡國侯散見漢書志傳

綏武侯印

龜鈕顧譜

右綏武侯印案地理志朔方郡沃野莽曰綏武此印宜是王莽時鑄然形制大而所見莽時官印多五字皆爲不合綏武

或非地名當與前菑川膠西二侯印同爲魏以後物

林慮侯章

范氏龜鈕

右林慮侯章案林慮本漢縣西漢曰隆慮後避諱改晉書地理志屬汲郡此印文多舛繆又改印爲章皆與前數印異恐非同時物

華陰伯印

右華陰伯印案地理志華陰屬京兆郡故陰晉秦惠文王五年更名甯秦高帝八年更名華陰太華山在南續漢書郡國志改屬宏農晉志同

林慮子章

金氏龜鈕

右林慮子章林慮詳前侯印

泉州子章

右泉州子章泉州亦漢縣屬漁陽郡晉志屬燕國

樂浪□章

楊氏譜

右樂浪□章案章上一字亦當是子字樂浪乃漢郡屬幽州
應劭曰故朝鮮國也晉志屬平州

白馬子章

右白馬子章案白馬亦漢縣屬東郡晉志屬濮陽國卽分東
郡置也此印大而文多繆

城紀子章

右城紀子章案城紀縣前漢晉皆屬天水郡東漢屬漢陽郡
城皆作成城成古通此印文亦多繆

彭城子印

右彭城子印案彭城漢縣屬楚國後漢改國名亦曰彭城晉

因之此稱印不稱章與前華陰伯印同

縣子章

右□縣子章縣上一字不可辨

盱眙男章

桂氏

右盱眙男章盱眙亦漢縣西漢屬臨淮郡東漢屬下邳國盱眙作台晉志亦屬臨淮宋書州郡志改爲盱眙太守而無縣矣

興樂男章

右興樂男章案漢魏以下郡縣皆無名興樂者或亦劉備封國所謂遙採嘉名不由土地所出者也

平陸男印

右平陸男印案平陸亦漢縣屬西河郡魏晉以下無平陸蓋封建可用舊名或亦劉備章武時所封之國也惟形制長方

又稱印不稱章恐是私記

宜陽侯相之印

查氏

右宜陽侯相之印攷宜陽縣漢屬宏農郡晉因之後漢有宜陽金門侯李瑋以尙書不附梁氏延熹二年八月封據劉瑜傳作亭侯瑋作偉見熊表此印文多之印二字與漢印異而與弋陽郡丞之印相似當是魏印

□里子尉

桂氏

右印文曰□里子尉案里上一字似貴桂氏釋作賁然皆無攷其云尉者蓋亦同漢制侯國有尉也

司徒左長史印

顧譜鼻鈕

右司徒左長史印集古印譜曰東漢百官志司徒公一人世祖卽位爲大司徒建武二十七年去大長史一人千石晉加

置左右長史各一人秩千石而攷魏志言孫詠爲司徒左長史則魏已加左右非始於晉也

驛驢別丞

范氏鼻鈕

右印文曰驛驢別丞案宋志驛驢廐丞一人漢西京爲龍馬長東京爲未央廐令魏爲驛驢令此印云別丞豈驛驢廐不止一丞卽漢別部司馬之意邪

安東將軍章

顧譜

右安東將軍章攷宋書百官志安東將軍漢末陶謙爲之惟此印較大而文多屈曲與漢印不類晉書百官志序言四征興於漢代四安起於魏初故附此

平西將軍

顧譜龜鈕

右印文曰平西將軍案宋志平西將軍一人四平西魏置集古

印譜曰晉周處爲平西將軍沈約宋書臨川王義慶爲平西將軍後齊四平將軍正三品梁以四平四翊爲卅班陳四平品第三秩中二千石藏義興周孝侯廟廟祝世掌之中溶攷蜀志馬超封爲平西將軍則非始於晉明矣

冠軍將軍

顧譜

右印文曰冠軍將軍案宋書百官志冠軍將軍魏正始中以文欽爲之

伏波將軍

顧譜

右印文曰伏波將軍制與前同故定爲魏物

討虜將軍

顧譜

右印文曰討虜將軍集古印譜曰建安五年曹操表孫權爲討虜將軍領會稽太守中溶攷東觀漢記光武以王霸爲討

虜將軍擊黃憲則東漢初已有之惟此印止四字形制亦與前同故列於魏此印亦見范譜文略同云龜鈕

討難將軍

右印文曰討難將軍案宋志討難將軍在四十號將軍內云或是後漢及魏所置

明威將軍

查氏

右印文曰明威將軍案明威將軍見宋志四十號內此印亦止四字當與前同

明威將軍印

吳氏

右明威將軍印案此亦明威將軍而有印字不全又文作兩行而多繆體皆與前異

武奮將軍印

右武奮將軍印見宋志四十號將軍內此上印兩行與前制同下印小而長爲異

厲武將軍印

右厲武將軍印案厲武將軍亦見宋志四十號內略與前同
討寇將軍印

右印文似是討寇將軍印而文多繆案討寇將軍亦見宋志四十號內形制略與前同

掃逆將軍司馬

印存

右印文曰掃逆將軍司馬案宋志四十號將軍內有掃逆云或是後漢及魏所置此印文頗工整然有六字與漢雜號將軍司馬印不同故列此

牙門將印

右牙門將印集古印譜曰魏黃初置冠服與將軍同王隱晉書云陸機少襲父爵爲牙門將中涓案牙門卽後代所呼之衙門也其說詳王楙野客叢書及周蜜齊東野語

牙門將印章

塗金龜鈕

右牙門將印章此印形制字文頗類漢印而較大

牙門將印章

顧譜鼻鈕

右牙門將印章案印文作兩行形制有異恐非同時物

牙門將之章

塗金龜鈕

右牙門將之章案印文改印爲之又與前異

騎督之印

龜鈕

右騎督之印集古印譜曰魏晉第五品有騎督高貴鄉公紀騎督敬琰魏志騎督偏將軍路蕃楊宗道印譜云晉彭祈碑

陰題名其官屬有騎督步督散督之號中溶攷三國魏志甘露五年有騎督成倅刺殺高貴鄉公注引魏氏春秋同又晉書輿服志中朝大駕鹵簿有羽林騎督幽州突騎督

校督之印

桂氏

右校督之印案校督蓋騎督之類

散督之印

桂氏

右散督之印案散督恐亦騎督校督之類

散部曲將印章

桂氏

右散部曲將印章案散部曲將猶言散督也恐同時物

部曲督印

鼻鈕

右部曲督印集古印譜曰孫皓天紀三年夏郭馬反馬本合浦太守修允部曲督晉紀李庠傳趙欽將有異志委庠以心

膺表爲部曲督晉世祖武帝咸甯五年除部曲督以下質任
中溶攷魏志甘露二年詔部曲督秦絜秉節守義以其子爲
騎都尉

副部曲督

印叢龜鈕顧譜鼻鈕

右印文曰副部曲督案副部曲督當卽部曲督之貳

魏興太守章

桂氏

右魏興太守章攷兩漢無魏興郡宋志魏興太守魏文帝以
漢中遺民在東垂者立屬荊州

弋陽郡丞之印

顧譜龜鈕

右弋陽郡丞之印案宋書州郡志云弋陽太守本縣名屬汝
南魏文帝分立領縣六晉志云魏文分汝南立弋陽郡統縣

七

□陵郡丞之印

桂氏

右□陵郡丞之印案此印字文略同前當爲三國時印攷晉志郡以陵名者有五廣陵武陵皆承漢之舊名又有零陵邵陵毗陵三郡此未知何郡

□□郡丞之印

右□□郡丞之印案印文剝落首二字不可辨

許昌令印

吳氏

右許昌令印案續漢書郡國志潁川郡許劉昭注左傳莊二十八年楚伐鄭鄭奔桐丘杜預曰縣東北有桐丘城獻帝徙都改許昌而攷獻帝紀建安元年八月庚申遷都許但云許不云改許昌又宋志潁川太守下云永初郡國又有許昌注云本昌許漢舊縣魏曰許昌又晉志云漢獻帝都許魏禪徙